

*Mустақил тадқиқотчи*

### **3.3.Бозоров**

**Аннотация:** Мазкур мақолада халқаро шартнома тушунчаси, халқаро шартномаларнинг миллий хукуқий тизимнинг таркибий қисми сифатидаги ўрни ҳамда аҳамияти борасида сўз юритилган. Шунингдек, мақолада халқаро шартномаларнинг давлатлар миллий қонунчилигидан устуворлик касб этиши ва хукуқий давлат фаолиятининг муҳим элементи сифатидаги ўзига хос жиҳатлари ёритиб берилган.

**Аннотация:** В данной статье рассматривается понятие международного договора, роль и значение международных договоров как составной части национальной правовой системы. Также в статье освещаются особенности международных договоров, имеющих приоритет над национальным законодательством государств и являющихся важным элементом деятельности правового государства.

**Abstract:** This article discusses the concept of an international agreement, the role and importance of international agreements as a component of the national legal system. Also, the article highlights the special aspects of international agreements gaining priority over the national legislation of states and being an important element of the activity of a legal state.

**Калит сўзлар:** халқаро шартнома, хукуқий тизим, ратификация, конвенция, резолюция, халқаро хукуқ.

**Ключевые слова:** международный договор, правовая система, ратификация, конвенция, резолюция, международное право.

**Keywords:** international agreement, legal system, ratification, convention, resolution, international law.

Ташқи сиёсат қуроли ҳамда миллий хавфсизликни таъминлашнинг воситаси сифатида халқаро шартноманинг роли бекиёсdir. Халқаро шартномалар давлатлараро муносабатларнинг хукуқий асосини ташкил этиш билан бир қаторда, умуминсоний тинчлик ва хавфсизликни сақлашга, Бирлашган Миллатлар Ташкилоти Уставининг мақсад ва тамойилларига мувофиқ, халқаро ҳамкорликни ривожлантиришга хизмат қиласди.

Инсоннинг асосий хукуқ ва эркинликларини ҳимоя қилиш, давлатларнинг қонуний манфаатларини таъминлашда халқаро шартномалар муҳим аҳамият касб этади. Халқаро шартномалар - халқаро хуқукий тартиб ва давлатлар ўртасидаги муносабатлар барқарорлигининг, хуқукий давлат фаолиятининг муҳим элементидир.

1969 йил 23 майдаги “Халқаро шартномалар хуқуки тўғрисида”ги Вена конвенцияси ҳамда 2019 йилдаги “Ўзбекистон Республикасининг халқаро шартномалари тўғрисида”ги Қонунга биноан, **халқаро шартнома** – бу шартнома, битим, конвенция, акт, пакт, баённома, хатлар ёки ноталар алмашинуви ҳамда халқаро шартноманинг бошқача номлари ва тузилиш усулларидан қатъи назар, хорижий давлат, халқаро ташкилот билан ёзма шаклда тузилган, халқаро хукуқ билан тартибга солинадиган халқаро келишув ҳисобланади.

Ўзбекистон Республикасининг 06.02.2019 йилдаги ЎРҚ-518-сонли “Ўзбекистон Республикасининг халқаро шартномалари тўғрисида”ги қонунининг 2-моддасига кўра, Ўзбекистон Республикасининг халқаро шартномалари халқаро хуқуқнинг умумэътироф этилган принциплари ва нормаларига, Ўзбекистон Республикаси Конституциясига, шунингдек ушбу Қонунга ҳамда халқаро шартномаларнинг ўз қоидаларига мувофиқ тузилиши, бажарилиши, тугатилиши ва уларнинг амал қилиши тўхтатиб турилиши лозимлиги белгиланган.

Халқаро хуқуқнинг умумэътироф этилган норма ва принциплари ҳамда Ўзбекистон Республикасининг халқаро шартномалари мудофаа ва хавфсизлик соҳасидаги норматив-хуқукий асоснинг муҳим таркибий қисми ҳисобланади. Замонавий халқаро хуқуқнинг императив нормалари ҳисобланган умумэътироф этилган норма ва принциплар ҳам миллий, ҳам халқаро хуқукий тизимнинг барча турдаги нормаларига нисбатан олий юридик кучга эга. Айнан шунинг учун ушбу хулқ-атвор қоидалари Ўзбекистон Республикаси Конституцияси ва бошқа қонун ҳужжатларида хуқукий жиҳатдан мустаҳкамлаб қўйилган.

Шунингдек, янги таҳрирда қабул қилинган Ўзбекистон Республикаси Конституциясининг 15-моддаси “Ўзбекистон Республикасининг халқаро шартномалари халқаро хуқуқнинг умумэътироф этилган принцип ва нормалари билан бир қаторда Ўзбекистон Республикаси **хуқукий тизимнинг таркибий қисмидир**”, деган янги норма билан мустаҳкамланди. Мазкур ўзгаришнинг мазмуни билан танишиш учун, биринчи навбатда хуқукий тизим тушунчасига таъриф бериб ўтиш лозим.

Хуқукий тизим – бу ўзаро боғлиқ, мутаносиб ва бир-бирига таъсир қилувчи хуқукий воситалардан иборат бўлган, ижтимоий муносабатларни, шунингдек, у ёки бу

мамлакатдаги хуқуқий ривожланиш даражасини тавсифловчи таркибий қисмлар йиғиндисидир<sup>1</sup>.

Америкалик хуқуқшунос олим Лоуренс Фридманнинг фикрича, хуқуқий тизим айнан хуқуқнинг тузилиш тизими қисмларининг бутун бир шаклидир. Демак, хуқуқий тизим деганда хуқуқ соҳаларининг тузилиши, ўзаро алоқаси ва муносабатини тушуниш мумкин. Давлатимиз хуқуқий тизимини конституциявий, маъмурий, фуқаролик, оила, меҳнат, жиноят, ижтимоий ҳимоя каби қатор хуқуқ соҳалари таркибий қисм сифатида ташкил этади. Эндиликда халқаро хуқуқнинг умумэътироф этилган норма ва принциплари ҳамда халқаро шартномалар ҳам ушбу рўйхатдан ўрин эгаллади ва бу факт конституция даражасида кафолатланди.

Халқаро шартномаларнинг миллий қонунчиликдан устуворлиги принципи БМТ Бош Ассамблеясининг 2001 йил 12 декабрдаги 56/83-сонли резолюцияси билан тасдиқланган халқаро хуқуқбузарликлар учун давлатлар жавобгарлигининг 32-моддасида, шунингдек, 1969 йил 23 майдаги “Халқаро шартномалар хуқуқи тўғрисида”ги Вена конвенциясининг 27-моддасида тарафлар ўз ички қонунчилиги қоидаларини шартномани бажармаслик учун асос сифатида келтира олмаслиги қоидаси мустаҳкамланган. Бундан ташқари, Германия, Франция, Испания, Филиппин, Хорватия, Чехия, Словения, Россия, Қозоғистон ва бошқа бир қатор давлатлар конституциявий амалиётида ҳам халқаро хуқуқнинг умумэътироф этилган принцип ва нормалари миллий хуқуқий тизимининг таркибий қисми эканлиги, халқаро шартномаларнинг қонунлардан устунлиги мустаҳкамлаб қўйилган.

Хусусан, Германия Конституциясининг 25-моддасида, халқаро хуқуқнинг умумий қоидалари федерал хуқуқнинг бир қисми эканлиги, улар қонунлардан устун туриши ва тўғридан-тўғри федерал ҳудуд аҳолиси учун хуқуқ ва мажбуриятларни яратиши белгиланган. Франция Конституциясининг 55-моддасида ҳам белгиланган тартибда ратификация қилинган ёки тасдиқланган халқаро шартномалар ёки битимларнинг миллий қонунлардан устун туришини назарда тутувчи норма мустаҳкамланган.

Маълумки, халқаро шартномаларининг устуворлиги принципининг бевосита Конституция даражасида белгилаб қўйилиши Ўзбекистоннинг халқаро мажбуриятларига содиқлиги, халқаро ҳамжамият кўз ўнгидаги ишончли ҳамкор сифатида намоён бўлиши,

1 Саидов А., Тожихонов У. Дарават ва хуқуқ назарияси: Икки жилдли. 2-жилд. Хуқуқ назарияси — Т.: Ўзбекистон Республикаси ИИВ академияси, 2001,— 48 б.

пировардида мамлакатнинг халқаро нуфузини оширишда муҳим аҳамиятга эга ҳисобланади.

Бугунги кунда Ўзбекистоннинг халқаро хуқуқнинг тўла хуқуқли субъекти сифатида 130 дан ошиқ нуфузли халқаро ташкилотларнинг аъзоси эканлиги, 142 давлат билан дипломатик алоқалар ўрнатганлиги, 4,5 мингдан ортиқ халқаро шартномаларга, инсон хуқуқларига оид 80 дан ортиқ халқаро хужжатларга қўшилганлиги мазкур норманинг янада долзарблигини тасдиқлади.

Юқорида назарда тутилган норманинг Конституцияда белгиланиши, ўз навбатида, халқаро шартномаларга амал қилишнинг хуқуқий асосини мустаҳкамлаш, давлатлар орасидаги дипломатик алоқаларни янада кенгайтириш, жаҳоннинг етакчи давлатлари ва халқаро ташкилотлар билан стратегик ҳамкорлик қилишнинг мутаносиб, кўп қиррали тизимини шакллантириш имконини ҳам беради.

Шу ўринда қайд этиб ўтиш лозимки, исталган халқаро шартнома Ўзбекистон Республикасининг халқаро шартномаси сифатида тан олинмайди. Яъни, халқаро шартномани ратификация қилиш, тасдиқлаш, қабул қилиш ёки қўшилиш орқали халқаро шартноманинг мажбурийлигига Ўзбекистон Республикасининг розилиги ифода этилган халқаро шартномаларгина Ўзбекистон Республикасининг миллий хуқуқий тизимиға киради<sup>2</sup>.

Бундан ташқари, Ўзбекистон Республикасининг халқаро шартномасида Ўзбекистон Республикасининг қонунида назарда тутилганидан бошқача қоидалар белгиланган бўлса, Ўзбекистон Республикасининг халқаро шартномаси қоидалари қўлланилиши тўғрисидаги нормани татбиқ қилишда, шуни ҳисобга олиш керакки, мазкур ҳолат миллий қонунчилик хужжатининг кучини йўқотишига сабаб бўлмайди, унинг амал қилишини тўхтатишга олиб келмайди. Аксинча, ўрнатилаётган қоида, ўз навбатида, хуқуқни қўлловчи органлар учун ўз ваколатлари доирасида халқаро хуқуқ нормаларини тўлақонли қўллашига хуқуқий асос бўлиб хизмат қиласи.

Конституцияга Ўзбекистон Республикаси хуқуқий тизимининг таркибий қисми сифатида давлатимиз аъзо бўлган халқаро шартномаларнинг киритилиши давлатимиз чин маънода хуқуқ устуворлигига эришишига интилиши ҳамда республиканинг халқаро

2 Исмаилов Б., Ш.Аламонова. Ўзбекистон Республикасининг халқаро шартномалари Ўзбекистон Республикаси хуқуқий тизимининг таркибий қисми сифатида. <https://oz.illp.uz/o%CA%BBzbekiston-respublikasining-xalqaro-shartnomalari-o%CA%BBzbekiston-respublikasi-huquqiy-tizimining-tarkibiy-qismi-sifatida/>

миқёсдаги нуфузи янада ошишини, фуқароларнинг хуқуқ ва эркинликлари ҳимояси нафақат миллий қонунчиликда белгиланган нормалар, балки халқаро хуқуқнинг умумэътироф этилган принциплари ва нормалари асосида ҳимояланишини таъминлайди.

### Фойдаланилган адабиётлар рўйхати

1. Янги таҳрирдаги Ўзбекистон Республикаси Конституцияси.— Т.: “Ўзбекистон” нашриёт-матбаа ижодий уйи, 2023 й.
2. Саидов А., Тожихонов У. Давлат ва хуқуқ назарияси: Икки жилдли. 2-жилд. Хуқуқ назарияси –Т.: Ўзбекистон Республикаси ИИВ академияси, 2001, – 48 б.
3. Фридман Л. Введение в американское право.— М., 1992,— С. 10.
4. “digitallibrary.un.org” сайти маълумотлари. [https://digitallibrary.un.org/record/454412/files/A\\_RES\\_56\\_83-RU.pdf](https://digitallibrary.un.org/record/454412/files/A_RES_56_83-RU.pdf)
5. “legalns.com” веб-сайти маълумотлари. <https://legalns.com/компетентные-юристы/правовая-библиотека/конституции-стран-мира/конституция-германии>